



## Павелай Тимофейдэ бэшэһэн хоёрдохи хандалга

**1** <sup>1-2</sup> Инаг хайрата Тимофей хүбүүмни, шамда би Павел бэшэнэб. Би Бурханай эрхэ мэдэлээр элшэнгээр һунгагдаад, маанадта Иисус Христостой нэгэдэхэдэмнай найдуулагдаһан амидарал тухай номнохоёо эльгээгдэһэн байгааб. Бурхан Эсэгэ болон манай Дээдын Эзэн Иисус Христос шамда һайн һайхание, үршөөл хайра ба амгалан тайбание үршөөг лэ.

*Павел баяр хүргэнэ, урмашуулна*

<sup>3</sup> Үбгэ эсэгэнэрэйнгээ мүргэдэг Бурханда би үнэн зүрхэнһөө алба хэжэ, үдэр һүнигүй тэрээндээ зальбархадаа үргэлжэ шамайе дурдан, баяр хүргэжэ байдагби. <sup>4</sup> Дуһааһан нулимсануудыешни һанаад, шамтай уулзаха гэжэ ехээр лэ хүсэнэб. Тиигэбэл, би баяраар дүүрэхэ һэнби. <sup>5</sup> Үнэн зүрхэнһөө Бурханда һүзэглэдэг байһыешни би һананаб. Лоида хүгшэн эжышни, Евника эхэшни үнэн зүрхэнһөө һүзэглэдэг бэлэй. Шишье баһал тиимэ һүзэгтэйш гэжэ би этигэнэб. <sup>6</sup> Тиимэһээ гараа дээрэшни табихадамни шамда Бурханһаа үгтэһэн абьяас бэлиг зосоошни бадаржал байг лэ. <sup>7</sup> Бурханай үршөөһэн Нангин Һүлдэ бидэниие аймхай болгодог бэшэ, харин хүсэ шадалаар, хайра дураар дүүргэдэг, бээ барижа ябаха шадал үгэдэг юм.

<sup>8</sup> Тиимэһээ манай Дээдын Эзэн Иисус Христос тухай гэршэлхээ бү айгаарай, Христосой түлөө түрмэдэ һуужа байһан намһаа бү эшэжэ, улайжа байгаарай. Харин Бурханай үгтэһэн хүсэ шадалаар Һайн Мэдээсэлэй түлөө зоболон дабажа байгаарай. <sup>9</sup> Бурхан хэһэн хэрэгүүдэймнай түлөө бидэниие абараа бэшэ, харин өөрынгөө һайн хүсэлөөр ба үршөөл хайраар бидэниие абаржа, гэгээн арад болгохоёо дуудаа юм. Бурхан сагай урадхалай эхи абахаһаа урда бидэндэ Иисус Христосой ашаар өөрынгөө үршөөлые хайрлаа юм.

<sup>10</sup> Харин мүнөө манай Абарагша Иисус Христосой ерэхэдэнь, тэрэ үршөөлынэ эли болоо. Христос Иисус үхэлые туйлажа, Хайн Мэдээсэлэй ашаар бүхы хүнүүдтэ мүнхын амидарал үршөөгөө.

<sup>11</sup> Хайн Мэдээсэл номнохымни тула Бурхан намайе элшэн ба хургагша болгон табяа. <sup>12</sup> Тиимэһээ би иигэжэ тулижа зобожо байнаб, зүгөөр би эшэжэ улайнагүйб. Ушарынэ юуб гэхэдэ, хэндэ хүзэглэжэ байһанаа би мэдэнэб, намда даалгаһан юумээ\* тэрэ Үдэр болотор Иисус Христос хадагалжа шадаха гэнэн этигэлтэйб. <sup>13</sup> Минии шамда хөөрэнэн үнэн зүб хургаалые хатуугаар баримталжа ябаарай. Тэрэ хургаал шамда жэшээ боложо байг. Иисус Христостой нэгэдэхэдэ олоһон хүзэг, хайра дураяа бадараажа ябаарай. <sup>14</sup> Шамда даалгагдаһан үлзытэй хайхан зүйлнүүдые сэдхэлдэмнай оршоһон Нангин Хүлдын хүсэ шадалаар хадагалжа байгаарай.

<sup>15</sup> Аси можын бүхы зон, тэдэнэй тоодо Фигелл ба Ермоген хоёр намайе орхижо ошоо гэжэ ши мэдэнэш. <sup>16</sup> Гэхэтэй сасуу оло дахин ханааемни заһажа байһанайнэ түлөө Дээдын Эзэн Онисифорой гэр бүлэдэ үршөөл хайраа харуулһай даа. Түрмэдэ һуужа байна гээд тэрэ намһаа эшэжэ зобожо байгаагүй, <sup>17</sup> харин Рим хото ерээд, намайе ехэл удаан бэдэржэ олоһон байгаа. <sup>18</sup> Дээдын Эзэн ерэхэ Үдэртөө тэрэндэ үршөөл хайраа хайрлаһай даа! Эфес хотодошые байхадаа, тэрэнэй намда ехэл туһа хүргэжэ байһыень ши хайнаар мэдэнэш.

*Иисус Христосой үнэн сэхэ сэрэгшэ*

**2** <sup>1</sup> Хүбүүмни, Иисус Христосой хайрлаһан үршөөл хайраарнэ бэхижэжэ бай. <sup>2</sup> Олон гэршэнэрэй хажууда хүнүүдые хургаха шадабаритай, этигэлтэй зондо намһаа дуулажа абанан хургаалаа дамжуулаарай.

<sup>3</sup> Иисус Христосой үнэн сэхэ сэрэгшэдэл адляар зоболонгуудые дабажа байгаарай. <sup>4</sup> Алба хэжэ байһан сэрэгшэ ахалагшадаа хайшаагдахын тула юрын ажамидаралтай холбоотой хэрэгүүдтэ оролсодоггүй юм. <sup>5</sup> Урилдаанда хабаадажа байһан тамиршан дүримүүдые баримталаагүй хаа, шагналда хүртэдэггүй юм. <sup>6</sup> Хүндэ ажал хэжэ байһан таряашан гараһан ургасаһаа түрүүн өөрөө амсаха ёһотой. <sup>7</sup> Хэлэнэн юумэнүүд тухаймни бодомжолжо байгаарай. Дээдын Эзэн шамда эдэ бүгэдые ойлгохо ухаан үршөөхэ.

---

\* Үгы хаа «минии Иисус Христосто даалгаһан юумые» гэжэ уншажа болоно.

<sup>8</sup> Минии номноһон Һайн Мэдээсэлэй ёһоор үхөөд амидырһан Давидай үри һадаһан болохо Иисус Христосые һанажа байгаарай. <sup>9</sup> Тэрэл Һайн Мэдээсэлэй түлөө би зобожо, үшөө тиихэдэ дээрмэ-шэндэл мэтэ гэнжээр хүлээтэй байнаб. Зүгөөр Бурханай үгые гэнжээр хүлижэ болохогүй юм. <sup>10</sup> Бурханай шэлэжэ абаһан хүнүүдэй Иисус Христосой ашаар абарагдан, мүнхын алдарта хүртэхын тула би эдэ зоболонгуудые дабажа байнаб. <sup>11</sup> Иигэжэ хэлэһэн үнэн зүб юм:

*«Хэрбээ бидэ тэрээнтэй хамта үхэһэн байбал,  
Тэрээнтэйл хамта амидархабди.*

<sup>12</sup> *Хэрбээ бидэ зоболонгуудые дабажа байбал,  
Тэрээнтэйл хамта зонхилхобди.  
Хэрбээ бидэ тэрээнһээ арсабал,  
Тэрэ баһал бидэнһээ арсаха.*

<sup>13</sup> *Амалһан юумэээ дүүргэдэггүй байхадамнай,  
Тэрэ айладхаһан лэ юумэээ ходо дүүргэдэг,  
Ушарынь тайлбарилжа хэлэбэл,  
Тэрэ өөрыгөө хубилгаха аргагүй юм».*

#### *Һайн хүдэлмэришэн*

<sup>14</sup> Хэлэһэн эдэ бүгэдыемни шагнагшадтаа һануулжа байгаарай. Үгэнүүд тухай арсалдахаяа болигты гэжэ Дээдын Эзэниие гэршэ болгон захиржа байгаарай. Тиимэ арсалдаан шагнагшадта ямаршые туһагүй, тэдэнэй хүзэг этигэл алдуулдаг юм. <sup>15</sup> Һайн албатан байнаш гэһэн Бурханай магтаалда хүртэхын тула һайнаар ажаллажа байгаарай. Хэжэ байһан ажалһаа эшэжэ зобохогүйн тула Бурханай үгые үнэн зүбөөр һургажа байгаарай. <sup>16</sup> Хүнүүдые Бурханһаа холдуулдаг, Бурханиие буруушааһан тэнэг шашалдаанһаа зайсажа байгаарай. <sup>17</sup> Тиимэ шашалдаан болбол махабад бэеэр таража байһан эдеэртэй яра шархада адли юм. Именей Филит хоёр тиимэ дэмы юумэндэ һургажа байна. <sup>18</sup> Тэдэ үнэн зүб замһаа хадуурба, бидэ хүзэглэгшэд амидыраабди гэжэ хэлэн зарим хүзэглэгшэдэй этигэл хүзэгые алдуулна. <sup>19</sup> Тиигэбэшые Бурханай татаһан бата һуури хүдлөөгүй юм. «Дээдын Эзэн өөрынгөө хүнүүдые мэдэхэ», «Дээдын Эзэнэй харьяалда орооб гэжэ хэлэһэн хүн нүгэлтэ хэрэгүүдые хэхээ болихо ёһотой» гэһэн үгэнүүдтэй тамга тэрэ татагдаһан һууриндань табигданхай байна.

<sup>20</sup> Томо гэртэ элдэб янзын амһартанууд байдаг: зариманиинь мүнгөөр гү, али алтаар хэгдэнхэй, нүгөө зариманиинь модоор гү,

али шабараар бүтээгдэнхэй; нэгэ заримыень тусхай ушарнуудта хэрэглэдэг, нүгөө заримыень үдэр бүхэн хэрэглэдэг юм. <sup>21</sup> Хүнүүд-ше баһал тиимэ. Зарим хүнүүд нүгэл хэхээ болижо, арюун сэбэр болоод, тусхай хүнүүд болодог. Тэдэнэй ажамидарал Бүтээгшэдэ таатай арюун гэгээн байдаг, тэдэ ямарше хайн хайхан хэрэгүүд-дые хэхэдэ бэлэн байдаг. <sup>22</sup> Залуугай ташаяанһаа зугадажа, Дээдын Эзэндэ үнэн зүрхэнһөө зальбаржа байһан зоноор хамта үнэн зүбые баримталжа, хүзэглэжэ, хайра дуратай, амгалан тайбан байгаарай. <sup>23</sup> Тэнэг, мунхаг хэрүүлһээ зайсажа байгаарай. Тэрээнһээл шэрүүн арсалдаан гарадаг гэжэ ши мэдэнэ ха юмши. <sup>24</sup> Дээдын Эзэнэй зараса, ши хэрүүл гаргангүй, харин уринаар хүн бүхэндэ хандажа, тэ-сэбэритэй хайн хургагша байха ёһотойш. <sup>25</sup> Шамда эсэргүүсэһэн хүнүүдые Бурхан нүгэл үйлэдэхыень болюулжа, өөртөө хандуулха, үнэн зүбые мэдэрхэ боломжо үгэхэ магадалтай юм хадань ши тэдэ зониие ехэл дарууханаар заһажа байгаарай. <sup>26</sup> Тиигэжэ тэдэнэр шолмосой эрхэ мэдэлдэ байһанаа мэдэржэ, һабарһаань мултаран тэрьедэхэ.

*Һүүлшын Үдэрнүүд*

**3** <sup>1</sup> Һүүлшын Үдэрнүүдтэ ехэл хүшэр байха гэжэ мэдэжэ байгаарай. <sup>2</sup> Хүнүүд бээ дээгүүр абанхай, алта мүнгэндэ шунанхай, омог бардам зантай, хорон үгэтэй, эхэ эсэгынгээ үгые дууладаггүй, хүнэй аша туһые харюулдаггүй, Бурханда шүтэдэггүй, хоорондоо эбгүй, <sup>3</sup> эбсэшэгүй ябадалтай, хүниие хардадаг, бэээ баридаггүй, дошхон хэрзэгы зантай, хайн юумэндэ дурагүй, <sup>4</sup> урбадаг, убайгүй ябадалтай, маадагар зантай, Бурханда шүтэнхаар, нааршаахань дээрэ гэжэ тоолодог, <sup>5</sup> Бурханда хүзэглэһэн хэбэр үзүүлээд, үнэн дээрэ сэдхэлдээ ямарше хүзэггүй хүнүүд байха. Тиимэ хүнүүдһээ зайсажа байгаарай. <sup>6</sup> Тэдэнэй зариманиинь айлаар ябажа, элдэб янзын ташаяан хүсэлэнгүүдтэ хүтэлүүлэн, нүгэл абаһан, һуража байдагшые һаа, <sup>7</sup> үнэн зүбые мэдэрдэггүй тэнэг эхэнэрнүүдэй толгойень эрьюулдэг юм. <sup>8</sup> Янэс Ямбрэс хоёрой Моисейдэ эсэргүүсэдэг байһандал тон адляар тэдэ зон зүб бодомжолхоёо болёод, хүзэгөө алдаад, үнэн зүбэй урдаһаа эсэргүүсэбэ гээшэ. <sup>9</sup> Тиимэһээ тэдэ зон холо ошохогүй, хүн бүхэн тэдэнэй тэнэг байһые мэдэрхэ. Тиимэл юумэн Ианний Имбравий хоёртой болоо һэн.

*Һуулышын заабаринууд*

<sup>10</sup> Зүгөөр ши минии хургаалые баримталбаш, намдал адли ажа-мидарнаш, намдал адли зорилготой, хүзэгтэй, хайра дуратай байнаш, намдал адли шиираг тэсэбэритэй байнаш. <sup>11</sup> Антиох, Икони, Листра хотонуудта хашуулан мүрдүүлдэг, зободог байһандамнил адли ши баһа хашуулан мүрдүүлнэш, зоболон эдлэнэш. Тэдэ зоболонгуудые би дабажа гараа хүнби, Дээдын Эзэн тэдэнһээ намайе аршалаа юм. <sup>12</sup> Иисус Христостой нэгэдэн, Бурханда хүзэглэн амидарха ханаатай хүн бүхэндэ тиимэ зоболонгууд тудаха. <sup>13</sup> Харин хара ханаатай, мэхэшэ зон бусад зониие эндүүрүүлхэ, өөһэдөөшье эндүүрэн бүри муу муухай юумэ үйлэдэжэл байха. <sup>14</sup> Харин ши һуража абаһан үнэн зүб юумэндэ хатуу этигэжэ, тэрэнээ бээлүүлжэ байгаарай. Шамайе хэнэй хургажа байһые ши мэдэнэш, <sup>15</sup> шинии үхибүүн байха саһаа мэдэдэг Нангин Бэшэг шамайе хургажа, сэсэн ухаатай болгоно. Тиин тэрэ ухаан Иисус Христосто этигэһэн хүзэгэйшни ашаар шамайе абарна. <sup>16</sup> Нангин Бэшэгэй номуудынь бултадаа Бурханай урмашуулгаар бэшэгдэһэн, тиимэхээ тэдэ булта үнэн зүб юумэндэ хургадаг, алдуунуудые шүүмжэлэн элирүүлдэг, заһадаг, үнэн сэдхэлтэйгээр ажамидархые заабарилдаг юм. <sup>17</sup> Тиимэхээ Бурханда алба хэжэ байһан хүн ямаршые буянтай һайхан хэрэгүүдые хэхэ бэлэдхэл гаража, тиимэ хэрэгүүдые бүтээхэ аргатай байхань болтогой.

**4** <sup>1</sup> Иисус Христос хаан ороноо захирхаяа ерэхэдээ үхэһэн ба амиды хүнүүдые бултыень шүүхэ. Тиимэхээ Бурханай, Христосой урда <sup>2</sup> Бурханай үгэ номногты гэжэ захиаб. Хүнүүдэй дуулаха дуратай, дурагүйшые байбалнь, сухарингүй номнохо ёһотойш. Буруу хэһэн юумэнүүдыень заажа, нүгэлнүүдыень шүүмжэлэн элирүүлэ. Гэхэтэй сасуу тэрэ хүнүүдые урмашуулжа, тэсэбэритэйгээр хурга. <sup>3</sup> Ушарынь юуб гэхэдэ, хүнүүд зүйтэй хургаал дуулахаяа болёод, шагнаха дуратай юумыень хэлэдэг багшанарые өөрынгөө дураар шэлэдэг саг ерэхэ. <sup>4</sup> Тэдэнэр үнэн зүб юумэ шагнахаяа болижо, хооһон үльгэр зугаа шагнадаг болохо. <sup>5</sup> Харин ши ямаршые ушарта бээе барижа, зоболонгуудые дабажа, Һайн Мэдээсэл дэлгэрүүлхэ ажалаа бүтээжэ, Бурханай зарасын дүүргэхэ ёһотой уялга гүйсэдхэжэ байгаарай.

<sup>6</sup> Ами наһатайгаа хахасаха сагни ерээ, амимни үргэлэй архидал адляар сасагдахань. <sup>7</sup> Бүхын барилдаанда би һайн барилдааб, урадхални

адагтаа хүрөө, этигэл хүзэгөө алдаагүйб. <sup>8</sup>Тиимэһээ үнэн сэхэ Заргаша, Дээдын Эзэн тэрэ үдэр намда үгэхэ шагналаа мүнөө бэлдээд байна. Тэрэ шагнал гансал намда үгэхэ бэшэ, харин тэрэнэй заларан ерэхые хүлеэжэ байһан бүхы зондо үгэхэ юм.

*Онсо үгэнүүд*

<sup>9</sup>Намда түргэхэн хүрэжэ ерэхые бодоорой. <sup>10</sup>Димас энэ оршолон дэлхэйдэ татагдажа, намайе орхёод, Фессалоники хото руу ябаа. Крискент Галадай можо, Тит Далмадын можо ошобод. <sup>11</sup>Гансал Лука намтай хамта байна. Ши Маркые дахуулжа ерээрэй, тэрэ ажалдамни тухатай байха. <sup>12</sup>Тихикые би Эфес ябуулааб. <sup>13</sup>Ши ерэхэдээ, Карпында орхихон субьемни, хуйламал бэшэгүүдыемни, илангаяа арһан хуйламал бэшэгүүдыемни абажа ерээрэй.

<sup>14</sup>Түмэр дархан\* Александр намда ехэл муу юумэ хээ һэн. Дээдын Эзэн хэһэн зэргээрнь тэрээндэ ашыень харюулаг лэ. <sup>15</sup>Шишье тэрээнһээ болгоомжолжо байгаарай, тэрэ манай үгын урдаһаа ехэл эсэргүүсээ юм.

<sup>16</sup>Түрүүшынхиеэ өөрыгөө хамгаалхадамни булта намайе орхижо ошоо бэлэй. Тэдэ зоние Дээдын Эзэн бү зэмэлэг лэ. <sup>17</sup>Тэрэ үедэ Дээдын Эзэн намтай байжа, намайе зоригжуулһан байгаа. Тиимэһээ би Бурханай үгэ бусад арадуудай бултанайнь дуулахаар гүйсэд номнохо шадалтай байгаа. Бурхан намайе үхэлэй һабарһаа аршалаа. <sup>18</sup>Дээдын Эзэн намайе муу юумэнһээ аршалан, тэнгэрийнгээ хаан орондо гэм зэмэгүйгөөр оруулха. Тэрэ хэтын хэтэдэ алдар солотой байхань болтогой.

*Һүүлшын амаршалга*

<sup>19</sup>Прискилла, Акила болон Онисифорой гэр бүлэдэ мэндые дамжуулаарай. <sup>20</sup>Эраст Коринф хотодо үлэбэ. Трофимые үбшэн байһан хадань би Милет хотодо орхёоб. <sup>21</sup>Үбэл болотор ерэхэ гэжэ оролдоорой.

Еввул, Пуд, Лин, Клавдий болон бэшэшье хүзэглэгшэд булта шамда мэндые дамжуулна.

<sup>22</sup>Дээдын Эзэн шамтай байхань болтогой.

Бурханай үршөөл хайра та бүхэнтэй оршожо байг лэ. Болтогой.

---

\* Зэдээр юумэ бүтээдэг дархан.